

LA CARTA DEL APOSTOL SAN PABLO A LOS COLOSENSES

¹ Che co jae Pablo. Che co jae Jesucristo jemimondo Tumpa jei vae rupi. Yanderivi Timoteo ime vi cua pe oĩ che ndive. ² Aicuatía cua tupapire Colosas pe pico vae pe. Pe reta vi co jae cherivi reta. Tumpa peñono tee iyupeguarã, jare piyeyocui cavi Cristo pe. YandeRu Tumpa jare yandeYa Jesucristo tumee peve ipiacavi jare ipiacatu.

*Pablo uyerure Tumpa pe upurugüirovia vae reta
re*

³ Numee yasurupai Tumpa pe peré. Jae co yandeYa Jesucristo Tu. Jare jecuaeño nduyerure peré. ⁴ Cuarãi nduyapo, nduicuaa güive quirãi perovia Cristo Jesús re, jare quirãi peau opaete uñeñono tee Tumpa peguarã vae reta. ⁵ Pe reta penoi cua mburuau, peäro peñ piyervia reve Tumpa umeeta peve vae ramo. Echa'ã Tumpa uñuvatu ma peve ara pe. Pe reta picuaa cua regua, ñee icavi vae piyandu yave. Echa'ã ñee icavi vae añete vae co. ⁶ Cua ñee jerãcua peve vae jerãcua vi opaete ivi rupi. Jare opaete que rupi quía quía güirovia, jare uyeyocui Tumpa pe pe reta rami. Echa'ã pe reta perovia, jare piyeyocui Tumpa pe, jocua ara Tumpa ipiacavi regua piyandu güive. Echa'ã picuaa añete co cua ñee. ⁷ Cua re piyemboe Epafras güi. Epafras uyeyocui Cristo pe ore ndive, jare nduai ete. Jae co penti Cristo jembiocui

pepuere perovia catu vae. ⁸ Jare jae uicuaaca oreve mburuau Espíritu Santo umee peve vae.

⁹ Jáeramo ore vi cua nduyandu güive, jecuaeño nduyerure peré. Nduyerure Tumpa pe, jae uicuaaca cavi vaerã peve jei vae. Tumpa tumee peve opaete aracuaa Espíritu pegua, picuaa cavi vaerã jae jei vae. ¹⁰ Tumpa tapembori, pico cavi vaerã. Echa'ã pe reta co jae yandeYa imbae. Jare cuarãi pico yave, pembiyeroviata co yandeYa. Jecuaeño piyeyocui yandeYa pe icavi vae piyapo vae rupi. Jare jecuaeño piyemboe Tumpa re, picuaa cavi ete vaerã. ¹¹ Tumpa tapemimirãta imbaepuere tuicha ete vae pe, pepiaguasu vaerã piyerovia reve. ¹² Pemee yasurupai yandeRu pe. Echa'ã jae umee ma peve penoi vaerã pembaerã opaete ūru uñeñono tee Tumpa peguarã vae reta pe uñemeeta vae. Echa'ã cua reta yugüireco tembipe pe. ¹³ YandeRu yanderepi ma mbaepuere pitumimbi re güinoi vae güi, jare yandererova ma Tai iporoyocuia pe. Jae uau Tai. ¹⁴ YandeRu yanderepi Tai imano rupi, jare yanembiasa yanembaoya reta güi.

Cristo yanembipiacatu ma Tumpa ndive imano rupi

¹⁵ Mbaeti etei quía uecha Tumpa. Êrei Tai uicuaaca yandeve quirãi co jae. Tai co jae opaete mbaembae uyeyapo vae iYa. ¹⁶ Echa'ã jae uyapo opaete. Jae uyapo opaete ara pe oĩ vae jare opaete ivi pe oĩ vae. Jae uyapo opaete yandepuere yaecha vae jare opaete yandepuere mbae yaecha vae. Jae uyapo opaete mburuvicha reta ara pegua jare ivi pegua, jare opaete mbaepuere güinoi vae. Jae

etei uyapo opaete iyupeguarã. ¹⁷ Jare jae icoño mai ndei mbae uyeyapo mbove, jare mbaetita tẽi mbae ipuere ico jae uyandareco'ã yave jese. ¹⁸ Jare upurugüirovia vae reta co jae Cristo jete rami, jare Cristo co jae upurugüirovia vae reta iñaca rami. Jae co tenondegua vae. Echa'ã jae tenonde voi icove ye ou umanocue vae reta ipite güi, jae ico vaerã opaete vae iYarã. ¹⁹ Echa'ã Tumpa uipota vae co jae etei ico vaerã Cristo jete pe. ²⁰ Tumpa uipota vae vi co umbipiácatu vaerã jae ndive Cristo rupi opaete ivi pe ñugüinói vae reta jare opaete ara pe ñugüinói vae reta. Echa'ã umee ma yandeve ipiacatu Cristo imano rupi curusu re.

²¹ Jare tenonde yave pe reta mbiri ete pico Tumpa güi. Echa'ã piyovaichose pepia pe Tumpa ndive, jare piyapose icavi mbae vae. Ërei añave Cristo pembipiácatu ma Tumpa ndive. ²² Jucuarãi jae uyapo imano rupi cuimbaerã uyeyapo yave. Jare jucuarãi uyapo, peñono tee vaerã iyupeguarã, jare agüiye vaerã penoi mbaeyoa, jare agüiye vaerã quia ipuere pembijeco mbae re, jae jovai peñ yave, ²³ jecuaeño piñemimirãta yave jare piñemiatangätu yave pepurugüirovia re, jare jecuaeño peñero yave piyerovia reve ñee icavi vae rupi uñemee peve vae. Echa'ã pe reta picuua ñee icavi vae opaete ivi pegua reta pe jerãcua vae. Jare che vi amimbeu ñee icavi vae, jare cuarãi ayeyocui Tumpa pe.

Pablo uyeyocui upurugüirovia vae reta pe

²⁴ Añave ayerovia aiporara aïperé vae re. Echa'ã aiporara aïcherete pe jocua uataño co Cristo jete

uipurara vaerã vae. Echa'ã jae jete co jae upurugüirovia vae reta. ²⁵ Echa'ã uñemee cheve ayeyocui vaerã upurugüirovia vae reta pe. Tumpa etei cheapo jae jembiocuirã, che ayeyocui vaerã peve, jare amimbeu vaerã peve opaete Tumpa iñee. ²⁶ Cua co jocua tenonde yave uyecuaa mbae vae. Echa'ã Tumpa uicuaaca'ã etei tenonde yave. Êrei añave Tumpa uicuaaca co oñono tee iyupeguarã vae reta pe. ²⁷ Echa'ã Tumpa iquirëi uicuaaca chupe reta quiräi cua tenonde yave uyecuaa mbae vae mbaeyecou tuicha vae güinoi judío mbae vae reta coti. Jae co Cristo ico pepia pe vae. Jáeramo pepuere peáro piyerovia reve Tumpa pembiyeroviata vae re.

²⁸ Ore vi numimbeu Cristo regua. Numbiaracuaa opaete vae, jare nomboe opaete vae orearacuaa catu reve, opaete vae ipiräta vaerã Cristo imbaepuere rupi. ²⁹ Cua jeco pegua che vi aparavíqui aí Tumpa pe. Tanta aparavíqui aí aiporara reve Cristo imbaepuere rupi. Echa'ã jae tanta uparavíqui oí chepia pe.

2

¹ Êrei aipota picuaa vaerã quiräi tanta aparavíqui aiporara reve peré, jare Laodicea pegua reta re, jare opaete cherecha mbae vae reta re. ² Aipota ete pepiacatu vaerã, jare piyerau vaerã, penti ramíño pico vaerã. Aipota piñemimiräta vaerã opaete picuaa vae rupi, jare picuaa vaerã jocua tenonde yave uyecuaa mbae vae Cristo regua yandeRu Tumpa uicuaaca yandeve vae. ³ Pipota yave pearacuaa catu, Cristo re uñevæ opaete aracuaa. Jare pipota yave picuaa

cavi mbae regua, Cristo uicuua cavi opaete mbae regua. ⁴ Jare cua che jae peve, agüiye vaerã quía pembitaví ñee icavi echa vae pe. ⁵ Echa'ã yepe tẽi che aĩ'ã pepi, ñerei jecuaeñó chepiá pe ayemingueta peré. Aicuua quirãi pico cavi co uyupii, jare quirãi piñemimirãta pepurugüirovia Cristo regua re. Jare cua re ayerovia.

⁶ Pembiresive ma yandeYa Jesucristo mburugüirovia rupi. Jae ramíño vi jecuaeñó pico perovia reve jese. ⁷ Piñemimirãta Cristo imbaepuere rupi, pecuacuua cavi vaerã jese. Piñemiatangåtu pepurugüirovia re. Echa'ã jucuarãi co piyemboe. Jecuaeñó pemee yasurupai Tumpa pe pepurugüirovia re.

Cristo umee ma yandeve tecove ipiau vae

⁸ Piñemoa, agüiye vaerã quía pembitaví aracuua taví pegua pe. Echa'ã cua nunga aracuua moromboe íví pegua retaño co. Oporomboe'ã Cristo re, jaeñó mbaembæ íví pegua re.

⁹ Echa'ã Cristo co jae Tumpa etei cuimbaerã uyeyapo vae. ¹⁰ Jáeramo opaete mbaembæ penoi, Cristo penoi ramo. Echa'ã jae co opaete mburuvicha reta ara pegua jare íví pegua iYa. ¹¹ Jare piñemicircuncidaca ma vi pepia pe, Cristo re perovia ramo. Echa'ã Cristo uyapo peve pepia pe vae penti cuimbae uñemicircuncidaca vae jete pe uyeyapo vae ramí co. Echa'ã Cristo perepi opaete mbaeyoa imbaepuere güi. ¹² Piyembibautizaca yave, piñeñotí co Cristo ndive, jare Tumpa umee peve tecove opa mbae vae Cristo ndive. Cua uyeyapo Tumpa imbaepuere rupi, pepurugüirovia ramo. Echa'ã

Tumpa umbijecove ye Cristo güeru umanocue vae reta ipite güi. ¹³ Tenonde yave pe reta penoi'ã tecove opa mbae vae pembaeyoa reta jeco pegua, jare piñemicircuncidaca'ã pembaeyoa reta güi ramo. Ërei Tumpa umee ma peve tecove opa mbae vae Cristo ndive jare pembiasa ma opaete pembaeyoa reta güi. ¹⁴ Tumpa umbai ma mboroyocui uyecuatía oĩ vae. Echa'ã jocua uyecuatía oĩ vae oyovaichose ore ndive, jare jecuaeño orembijecose. Ërei Tumpa güiraa co oregüi, Cristo uyecutuca curusu re yave. ¹⁵ Jáeramo Tumpa yanderepi ma opaete mbaepuere yanderé güinoise vae reta güi, jare umimaraca reta opaete vae jovaque. Echa'ã Tumpa umiamiri reta, Cristo umano yave curusu re.

¹⁶ Jáeramo agüiye quía tapembijeco mbae peu vae re, jare fiesta reta iara reta re, jare yasipiau re, jare mbutuu ara reta re. ¹⁷ Echa'ã opaete cua reta jaanga retaño co. Tenonde yave Tumpa umijaanga reta uyeyapota vae re. Echa'ã cua reta uyemijaangaño Cristo re. ¹⁸ Agüiye quía tapeopia Tumpa umeeta peve vae güi. Echa'ã amocue vae uñemimichi-raanga, jare umbiadora ángel reta. Cua nunga ipia pe uyemingueta tẽi uicuua co uecha mbae vae regua, jare uyembicate ipiayemingueta rupiño uicuua vae re, yepe tẽi mbae uicuua cavi'ã. ¹⁹ Cua nunga uyeco'ã Cristo re. Echa'ã Cristo co jae upurugüirovia vae reta iñaca. Echa'ã opaete yandeyuapiapia jare yanderayi uyapo yanderete penti ramíño. Ërei yanderete uyeco ñaneãca re, ucuacuua cavi vaerã.

Jucuarāiño vi Cristo jete ucuacuaa Tumpa jei vae re.

²⁰ Pe reta pemanco co Cristo ndive moromboe ivi pegua reta güi. Jáeramo ¿maera pa jecuaeño pico ivi pegua reta yugüireco rami? jare ¿maera pa piyapo iporoyocui reta? ²¹ Echa'ã jae reta peocui cuarāi: "Agüiye pipisi. Agüiye peu. Agüiye piyaviqui." Jucuarāi jei reta. ²² Ërei opaete jocua mbaembae uyembaita co, uyeporu yave. Jare opaete cua mboroyocui reta moromboe ivi pegua retaño co. ²³ Añete co, cua nunga mboroyocui aracuaa pegua echa co. Echa'ã cua nunga mboroyocui iyapoa reta umbiadora-raanga Tumpa pe ipia pe uyemingueta vae reño, jare uñemimichi-raanga, jare uiporaraca jete pe. Ërei cua mbaembae rupi ipuere'ã etei oyopia jete uipota vae reta.

3

¹ Tumpa umee ma peve tecove opa mbae vae Cristo ndive. Jáeramo jecuaeño pepia pe piyemingueta mbaembae ara pe ñugüinoi vae re. Echa'ã joco pe Cristo uguapi oĩ Tumpa iyipi pe iyacata coti. ² Jecuaeño pepia pe piyemingueta mbaembae ara pe ñugüinoi vae re. Agüiye jecuaeño pepia pe piyemingueta mbaembae ivi pe ñugüinoi vae reño. ³ Echa'ã pemanco ma ivi pegua güi, jare perecove añetete vae ime ma oĩ Cristo ndive Tumpa oĩ vae pe. Mbaeti quía ipuere uecha. ⁴ Cristo co jae perecove añetete vae. Cristo uye-cuaa ye yave, pe reta vi piyecuaata jare piyerovita jae ndive.

Teco mai indechi vae jare teco mai ipiau vae

⁵ Jáeramo agüiye pemaeno icove vaerã jocua teco mai ivi pegua icavi mbae vae perete pe oĩ vae. Agüiye piyapo aguasa. Agüiye pepia pe piyemingueta icavi mbae vae re. Agüiye peporopotaiño. Agüiye pipota icavi mbae vae. Agüiye pipota ūru vae reta imbaembae - echa'ã pipota yave, pipota ete ūru vae reta imbaembae Tumpa güi. ⁶ Cua icavi mbae vae jeco pegua Tumpa uiporaracata co jae jei vae uyapo'ã vae reta pe. ⁷ Tenonde yave pe reta vi piyapose cua icavi mbae vae reta. Echa'ã picose jucuarãi piyapo vaerã. ⁸ Êrei añave pemombo piyugüi opaete cua ūru icavi mbae vae reta. Agüiye pepochi. Agüiye pearasi. Agüiye piyapo icavi mbae vae piyupe. Agüiye pere icavi mbae vae piyupe. Agüiye pemoë ñee pichii vae. ⁹ Agüiye peapu piyupe. Echa'ã pemombo ma piyugüi pereco mai indechicue pichii vae jare icavi mbae vae reta piyapose vae. ¹⁰ Jare pipisi ma teco mai ipiau vae. Echa'ã cua teco mai ipiau vae umbipiauta pepia pe piyemingueta vae, picuua cavi vaerã Tumpa regua, jare pico vaerã jae jei vae re. Echa'ã Tumpa umee peve cua teco mai ipiau vae. ¹¹ Jare cua teco mai ipiau vae güinoi vae reta ipite pe mbaeti ma uyuavi uyugüi judío mbae vae jare judío, uñemicircuncidaca vae jare uñemicircuncidaca mbae vae, ñanaigua reta, uyeyocui vae jare uyeyocui mbae vae. Echa'ã jaeño Cristo ico opaete vae ipia pe.

¹² Tumpa perau, jare peparavo peñono tee vaerã iyupeguarã. Jáeramo pico cavi. Piyeparareco. Pepiacavi piyupe. Piñemimichi piyupe. Pepiaguasu piyupe. ¹³ Pemiaguanta

piyupe, jare piyembiasa, ime yave quía ūru vae mbae re umbijeco vae. Echa'ã yandeYa pembiasa ma. Jae ramiño vi pe reta piyembiasa. ¹⁴ Jare piyerau. Echa'ã mburuau icavi ete opaete ūru güi. Echa'ã piyerau yave, pico cavi eteta uyupii penti ramiño. ¹⁵ Jare Tumpa ipiacatu pepia pe oĩ vae tuicuaaca peve mbae icavi piyapo vaerã vae. Echa'ã cuarã Tumpa preparavo, pico vaerã penti ramiño. Jare jecuaeño pemee yasurupai Tumpa pe.

¹⁶ Nee Cristo regua jecuaeño tuico pepia pe. Piyemboe jare piyembiaracuaa pearacuaa catu reve. Piyerovia reve pecanta yandeYa pe canta reta yambiadora pipe vae. ¹⁷ Jare mbae re piyemingueta yave jare mbae piyapo yave, piyemingueta jese jare piyapo opaete yandeYa Jesús jee re. Jare jecuaeño pemee yasurupai yandeRu Tumpa pe yandeYa Jesús rupi.

Yayeyocui yandiyupe

¹⁸ Cuña reta tuyeyocui ime pe. Echa'ã icavi co ju-cuarãi uyapo vaerã. Echa'ã güirovia ma yandeYa re.

¹⁹ Cuimbae reta tuau jembireco, jare agüiye tipochiiño chupe.

²⁰ Cunumi reta jare cuñatai reta tuyapo opaete tu jare ichi jei vae. Echa'ã cua icavi co yandeYa pe.

²¹ Tu reta agüiye tumbiarasiño isambiai reta, agüiye vaerã isambiai reta umbiaqui.

²² Uyeyocui vae reta tuyapo opaete ipatrón jei vae. Agüiye tuyeyocui cavi ipatrón pe jae umae oĩ jese yaveño, umbiyerovia vaerãño. Ipiquirëi reve tuyeyocui chupe uipiù reve yandeYa güi.

²³ Jare opaete uyapo vae, tuyapo ipiaquirēi reve. Tuyeyocui ipatrón pe, yandeYa pe uyeyocui rami. Echa'ã cuimbae peño'ã uyeyocui oĩ. ²⁴ Jare tuicuaa yandeYa umbijecoviata co chupe jocua umeeta chupe vae pe. Echa'ã uyeyocui co oĩ yandeYa Cristo pe. ²⁵ Êrei icavi mbae vae uyapo vae pe Tumpa umbijecoviata vi icavi mbae vae uyapo vae re. Echa'ã Tumpa uau'ã penti vaeño ūru vae güi.

4

¹ Patrón reta tuyapo jipi vae jembiocui reta pe, jare agüiye tumbitavi. Echa'ã tuicuaa jae reta vi güinoi co iYa ara pe.

² Jecuaeño piyerure Tumpa pe. Piñemiatangātu, jecuaeño piyerure vaerā pemee reve yasurupai Tumpa pe. ³ Jae ramiño vi piyerure oreré, Tumpa uicuaaca vaerā oreve quirāi numimbeu vaerā iñee. Echa'ã chequirēi chemiari tenonde yave Cristo regua uyecuaa mbae vae re. Echa'ã jáeramo che aĩ cua peresoríru pe. ⁴ Piyerure cheré, aicuaaca cavi vaerā ūru vae reta pe. Echa'ã icavi co cuarāi ayapo vaerā.

⁵ Pico pearacuuaa catu reve upurugüirovia mbae vae reta ndive. Jecuaeño piyapo icavi vae.

⁶ Jecuaeño piyemingueta ñee icavi vae pe mbae icavi vae re. Jare piyemboe quirāi piyemingueta vaerā ipotave vae pe.

Saludo reta

⁷ Tíquico co jae cherivi aau vae. Jae co penti yandeYa jembiocui che ndive uyeyocui cavi yandeYa pe vae. Jae umimbeuta peve opaete

cheregua. ⁸ Echa'ã cuarã amondo pepi, jae uicuaa vaerã peregua, jare jae pembipiacatu vaerã. ⁹ Amondo vi jae ndive Onésimo. Jae vi co cherivi aau vae yandeYa pe uyeyocui cavi vae. Jae co penti perentaigua. Jae umimbeuta peve opaete mbae cua pe uyeyapo vae. ¹⁰ Aristarco jei peve Tumpa ndiveño peñ. Jae ime che ndive oñ peresoriru pe. Marcos vi jei peve Tumpa ndiveño peñ. Jae co Bernabé jii. Echa'ã che poyocui ma pembiresive cavi vaerã, jae oo pepi yave. ¹¹ Jesús vi jei peve Tumpa ndiveño peñ. Jae co Justo pe uyembijee vae. Echa'ã opaete judío reta upurugüirovia vae güi cua retaño chembori amimbeu vaerã Tumpa iporoyocuia regua. Jae reta chembipiacatu ete. ¹² Epafras vi jei peve Tumpa ndiveño peñ. Jae vi uyeyocui Cristo pe. Jare jae vi co penti perentaigua. Jae jecuaeño uyerure ete Tumpa pe peré, piñemimirata vaerã, jare picuaa cavi vaerã opaete Tumpa jei vae. ¹³ Echa'ã che etei chepuere amimbeu peve quirai Epafras uparaviqui tanta peré, jare Laodicea jare Hierápolis pe ñugüinói vae reta re. ¹⁴ Lucas jare Demas vi jei peve Tumpa ndiveño peñ. Lucas co jae upurupiano vae aau vae.

¹⁵ Tumpa ndiveño toñ upurugüirovia vae reta Laodicea pegua, jare Ninfas jare opaete upurugüirovia vae reta Ninfas jenta pe uyembati vae. ¹⁶ Pe reta pemingueta ma yave cua tupapire, pemondo Laodicea pe upurugüirovia vae reta joco pe uyembati vae vi umingueta vaerã. Jare jocua tupapire Laodicea pe amondo vae pe reta pemingueta vi. ¹⁷ Pere Arquipo pe tuñemiatangatu, uyapo vaerã mbaraviqui

yandeYa umee chupe vae, uyeyocui vaerã
yandeYa pe.

¹⁸ Che etei jae peve Tumpa ndiveño peñ. Cua
aicuatía chepo pe etei. Pemandúa peresoriru pe aĩ
vae re. Tumpa tumee peve ipiacavi. Amén.

**Nuevo Testamento Guarani Pe
New Testament in Guaraní, Western Bolivian
(BL:gnw:Guarani, Western Bolivian)**

copyright © 2012 Wycliffe Bible Translators, Inc.

Language: Guaraní, Western Bolivian

Translation by: Wycliffe Bible Translators, Inc.

Guaraní, Western Bolivian [gnw], Bolivia

Copyright Information

© 2012, Wycliffe Bible Translators, Inc. All rights reserved.

This translation text is made available to you under the terms of the Creative Commons License: Attribution-Noncommercial-No Derivative Works. (<http://creativecommons.org/licenses/by-nc-nd/3.0/>) In addition, you have permission to port the text to different file formats, as long as you do not change any of the text or punctuation of the Bible.

You may share, copy, distribute, transmit, and extract portions or quotations from this work, provided that you include the above copyright information:

You must give Attribution to the work.

You do not sell this work for a profit.

You do not make any derivative works that change any of the actual words or punctuation of the Scriptures.

Permissions beyond the scope of this license may be available if you contact us with your request.

The New Testament

in Guaraní, Western Bolivian

© 2012, Wycliffe Bible Translators, Inc. All rights reserved.

This translation is made available to you under the terms of the Creative Commons Attribution-Noncommercial-No Derivatives license 4.0.

You may share and redistribute this Bible translation or extracts from it in any format, provided that:

You include the above copyright and source information.

You do not sell this work for a profit.

You do not change any of the words or punctuation of the Scriptures.

Pictures included with Scriptures and other documents on this site are licensed just for use with those Scriptures and documents. For other uses, please contact the respective copyright owners.

2014-04-25

**PDF generated using Haiola and XeLaTeX on 11 Nov 2022 from source files
dated 29 Jan 2022
09a8356f-416c-5877-91cf-40f681db481e**